

von Wulf Wager

## *I fahr gwieß nemme ...*



Letschta Donnerschdag war i mit meira Frau en dr Stadt. Do hemmr subbr guad gessa ond 's war en scheenr lauer Sommrobend. Do isch des Gwidder scho en dr Luft gläga, wo mr en's Auto gstiega send, ond zwor en doppltr Hinsicht.

Weil mei Auto grad en dr Werkstatt war, han i a Kondadienschtfahrzeug ghet. Deshalb han i fahra miassa, obwohl i zwoi Viertala ghet han. Mei Frau hot nix tronka ghet. Drbei werdat 17% von alle O'fäll von Betrunkene gmacht. Des hoißt em Omkehrschluss, dass 83% von de O'fäll von nüchterne Fahrer gmacht werdat. Ja Leutla, do sottat sich dia nüchterne Idiota von de Stroßa fernhalta, no kennt mr dia Sicherheit om 400 % steigra.

Zrück zom Thema: Je weiter mir uf d' Fildra komma send, desto meh hot's blitzt ond donnert ond uf oimol au saumäßig afanga zom saicha. Mr hot fascht nix gseah, also ben i ondr Fuchzich ufr dr B 27 gfahra. Wo's no weniger worda isch mit em Reaga, ben i wieder 80 bis 90 gfahra, aber die Leuchtafla hend emmr no 60 azoigt. Jetzt isch 's zwoite Gwitter iber me ra. Mei Frau hot me jessasmäßig vrseckelt, dass i gefälligscht 60 zom fahra häb, ond et meh. Des han e no aus Angscht vor ihra au doa. Allerdings war i dr oinzigschte!! Hunderte Autos send mit 120 ond no schneller an mir vorbei. No han i d' Warnblinkalag agmacht, dass die von henda drückende Autos mi als stehendes Hindernis wahrnehmat. Des hot mr wieder an baisa Blick eibrocht. Also han i die Warnblinkalag wieder ausgeschaltet. Damit mi abr neamr kennt, han i mein Kraganufzoga ond en Huat aufgesetzt, damit mir mi wenigstens für en Opa hält. Künftig lass i mei Frau fahra, des kennat Se mir glauba ...

Bis näggschd Woch'  
Ihr

Wulf Wager  
Alle Kolumna zom nochles  
ondr: [www.woascht.de](http://www.woascht.de)